



Rabu, 14 April 2021

Ogen: Jeremia 52 : 12-23



Keri kerinana



Ibas sada paksa jadi me kepesengen si mesangat ibas sada ingan, labo ieteh ija nari asal api e tapi enggo meseng kerina pajak si ije kin ingen erbinaga enterem jelma. I pajak e me kegeluhen kalak sinterem, ije ia cari makan ertahun tahun enggo idahikenna. Pagi pagi si lampas lenga lit jelma nggo jadi kebakaren si mesangat , emaka kenca ieteh kalak si erbinaga enda maka pajakna ingan cari makan enggo meseng kerina ras barang binagana, sora tangis lanai kel lang-lang gangna, kerina tangis teriluh lanai tersaroi. Enggo keru kerinana, radas seh ku lantai kerina ingan erbinaga e keru tembok beton nari ngenca teridah, tingkat dua pajak e pe enggo keru kerina, seh kal getemna, seh kal sedihna, sedak nari nge iakap simada pajak e si enggo ndekah ia erbinaga ije.

Bageme bangsa Israel kenca ibaba ia ku bas pembuangan Babilon, ikuasai bangsa enda me Jerusalem, icilukna me rumah pertoton si mehaga ingan bangsa enda ersembah man Tuhan sedekah enda. Benteng benteng kota pe kerina ikerneppen tentera kalak Babilon. Tiang tiang rumah pertoton krina iradasken ras gereta-gereta si lit i je. Kerina perkakas-perkakas si lit ibas rumah pertoton e ibabana ku Babilon kerina la lit si itadingkenna adi iakapna meherga, apai denga ka perkakas ibas tembaga nari, keru kerina ibaba ku Babilon.

Ceda kal ate ngidah kai si jadi inegeri e tapi la banci erban kai pe sabab bangsa enda enggo ibaba ku pembuangan. Rajana enggo mate, emaka pengarapen bangsa Israel lanai lit, sabab kesempatan ersembah man Tuhan pe lanai lit paksa sie.

Mungkin saja pe melala perbebenta paksa genduari, rumahta lanai banci iingani erkiteken bencana, lanai ka pe kita banci erjuma ras cari makan, ija sedekah enda banci kita ije nggeluh ras keluarganta. Tentu aru ateta, emaka marilah kita erpengendes man Tuhan sabab bas IA ngenca kita megegeh.